

Inatsisinut Ataatsimiititaliaq

-/ MAANI

Ulloq: 13-05-2015

J.nr.: 01.34.05-00002

UPA2015/150 Aningaasarsiaqartitsineq pillugu inatsisip allanngortinnejarnissaanik siunnersuut pillugu tusarniaanermi akissut

Inatsisinut Ataatsimiititaliap allakkatigut 10. april 2015-imeersutigut inatsisissatut siunnersummut pineqartumut Suleriaatsimut Ataatsimiititaliaq oqaaseqaateqaquaa, Suleriaatsimut Ataatsimiititaliamit akisassanik apeqqutinik erseqqinnerusunik arfineq-pingasunik apeqquteqarluni.

1. pill.: Aningaasarsiaqartitaanermut inatsimmi sulinngiffeqartarnermut malittarisassat pisariillisarneqarnissaannik taamaalilluni sulinngiffeqarallartarnermut najuutinngikkallartarnermullu Inatsisartut suleriaasianni malittarisassanik erseqqinnerusunik aalajangersaanissap Inatsisartunut suliakkiutigineqarnissaanut siunnersummut Suleriaatsimut Ataatsimiititaliaq oqaaseqaatissaqarpa?

Takuneqarsinnaavoq Inatsisartunut ilaasortat eqqarsaatigalugit sulinngiffeqartarneq najuutinngikkallartarnerlu pillugit malittarisassat maannamut malittarisassani assigiinngitsuni ikinnerpaamik pingasuni aalajangersarneqarsimasut, tassalu:

- Inatsisartut Suleriaasianni, minnerunngitsumik § 56-imi kiisalu § 58-imi.
- Inatsisartut Naalakkersuisullu pillugit Inatsisartut inatsisaanni, minnerunngitsumik § 4-mi.
- Inatsisartunut Naalakkersuisunullu ilaasortat aningaasarsiaqartinneqarnerat pillugu Inatsisartut inatsisaanni, minnerunngitsumik § 2-mi.

Siulittaasoqarfiup inatsisissatut siunnersuutaasigut ataatsimoortutigut ilaasortat Inatsisartunit qaqugukkut sulinngiffeqarsinnaanerat najuutinngikkallarsinnaanerannullu malittarisassat ataatsimut katersorneqarput, Inatsisartut Suleriaasianni ilanngussatut nutaatut (Ilanngussaq 2) ilanngunneqartussami. Taamaalilluni sulinngiffeqarneq eqqarsaatigalugu aningaasarsiaqartitsineq pillugu inatsimmi taamaallaat aalangersagarineqalissapput Inatsisartut Suleriaasiannut ilanngussami malittarisassani nutaani aalajangersakkat malillugit Inatsisartunut ilaasortat sulinngiffeqarnerisa aningaasarsianut malitsigisassaannut tunngasut.

Takuneqarsinnaavortaaq sulinngiffeqartarneq pillugu aalajangersakkat massakkumut atuuttut eqqortumik nassuiarniaraanni piumasaqataammat aalajangersakkanik qulaani taaneqartunik, inatsisinik allanngortitsisarnerit assigiinngitsut ilanngullugit, sukumiilluinnartumik ilisimasaqarnissaq, taamaattorli oqaatigineqarsinnaanani malittarisassat taakku assigiinngitsut pingasut pitslugit malittarisassanut nassuaatini oqaatigineqartut akornanni tamakkiisumik naapertuttoqartoq.

Taamatuttaaq atuarneqarsinnaavoq 2003-milli aningaasarsiaqartitsineq pillugu inatsisip § 19-ani tunngavissatut aalajangersagaqareersimammat Inatsisartut Siulittaasoqarfiannik periarfissiisumik ilaatigut Inatsisartunut ilaasortat sulinngiffeqartarnerat pillugu ataatsimoortumik malittarisassiorsinnaanissamut. Periarfiissutillu tamatuma atornissaanut Siulittaasoqarfik maannamut periarfissaqarsimannilaq, taamaalillutillu ilaasortat sulinngiffeqarnissamik



najuutinngikkallarnissamillu qinnuteqaatigisartagaat nalinginnaasumik suliarineqartarsimallutik taakku suliarineqartarnissaannut siulittaasoqarfiup suleriaasia qaqugukkulluunniit atuuttoq naapertorlugu. Taamaalilluni suliassaqarfimmi pisinnaatitaaffitik periarfissatillu ilisimassallugit ilaasortanut ajornakusoorsimavoq.

Taamaalilluni suliassaqarfimmi maannamut inatsisitigut inissisimasimaneq pissusissamisoorluinnartutut oqaatigineqarsinnaanngilaq. Suleriaatsimut Ataatsimiitaliap taamaattumik assut iluarismaarpaa Inatsisartunut ilaasortat sulinngiffeqartarnerat najuutinngikkallartarnerallu pillugit aalajangersakkat maanna ataatsimut malittarisassani ataatsini, Inatsisartut Suleriaasiannut ilanngussatut ilanngunneqartartussani, katersorneqarlutillu erseqqissarneqarmata. Ataatsimiitaliap pissusissamisoortutut isigaa malittarisassat taakku Siulittaasoqarfimmit pinnani Inatsisartunit namminernit akuersissutigineqartalerpata, tunngaviusumimmi imaattariaqarmat Inatsisartut namminneq taakkuusariaqartut ilaasortamik susinnaanerannut malittarisassanik akuersissuteqartartut.

2. pill.: Suleriaatsimut Ataatsimiitaliaq isumaqarpa § 2, imm. 4, oqaaseqatigiinni kingullermi aalajangersagaq, taanna naapertorlugu aningaasarsiaqarani sulinngiffeqarnermut piumasaqaatigineqarsinnaalluni Inatsisartunut ilaasortap nammineq sinniisussamik ataatsimiigiaqquneqarnermut atatillugu aningaasartuutit akilissagai, malittarisassani nutartikkani nutaani aamma ilannguttariaqartoq:

Aningaasarsiaqartitsineq pillugu inatsimmi atuuttumi 2003-meersumi § 2, imm. 2, oqaaseqatigiit kingulliit, ima oqaasertaqarput:

"Immiikkut ittumik pisuni sinniisussamik aggersaanermut atatillugu aningaasartuutit akilerneqarnissaat sulinngiffeqarallarnermik akuersinissamut tunngavissanngortinneqarsinnaavoq."

Aningaasarsiaqartitsinermulli inatsimmut 2003-meersumut nassuaatini aalajangersakkamut suut tunngaviunersut sukumiinerusumik nassuaatigineqanngillat. Taamaasilluni aalajangersakkap siunertaa ersernerlussinnaavoq, naatsorsuutigineqarsinnaallunili pinaveersaartitsinissaq aalajangersakkut siunertarineqarsimasoq, taamatullu aamma erseqqilluni immikkut aalajangersagaq pineqartoq aatsaat pisuni immikkorluinnaq ittuni, malittarisassanik atornerluinertut taaneqarsinnaasuni, atorneqartartussaasoq.

Taamatut immikkorluinnaq pisoqarsinnaaneranut assersuutitut eqqarsaatigineqarsinnaavoq ilaasortaq ataatsimiinnermi ulloq kingulleq sulinngiffeqarnissaminik qinnuteqarpat sinniisussap avinngarusimasumi najugallip ataatsimiigiaqquneqarnissaa siunertaralugu, taamaaliornikkut partiip ilaasortap ilaasortaaffigisaata inatsisartut ataatsimiinnerata kinguninngua ataatsimeersuarnissaanut atatillugu ilaasortap angalaneranut ullormusiissaanullu aningaasartuutit sipaarsinnaaniassammagit. Assersuummi tassani aalajangersagaq, anguniakkamik naalakkersuinikkut suliaqarnermut tapiissuteqartarneq pillugu Inatsisartut inatsisaannut nr. 16-imut, 3. december 2009-meersumut tunngaviusumut ikorfartuisutut isigineqarsinnaavoq. Taamaalilluni inatsimmi taaneqartumi aalajangersarneqarpoq Namminersorlutik Oqartussat naalakkersuinikkut sulinermut naalakkersuinikkullu suliniaqatigiiffinnut toqqaannanngitsumik aningaasatigulluunniit tapiissuteqarsinnaanngitsut, tamanna inatsimmi erseqqilluinnartumik tunngavissaqartinnagu.

Assersuutitut allatut eqqarsaatigineqarsinnaavoq Inatsisartunut ilaasortaq ataatsimiinnerup nalaani sulinngiffeqarnissani siunertaralugu piffissami sivikinnerusumi sulinngiffeqarniarluni



qinnuteqarpat. Taamatut pisoqassagaluarpat tamanna innuttaasunut kanngutsaatsuliornertut isigineqarsinnaavoq Nunatta Karsia sinniisussamik ataatsimiigiaqqusinermut immaqa annertungaatsiartunik aningaasartuuteqarpat, naak sulinngiffeqarnerup siunertaa Inatsisartut susassarinngikkaluaraat.

Ataatsimiitaliap ilisimasai malillugit Inatsisartut Siulittaasoqarfiata aalajangersagaq taanna maannamut atorsimanngisaannarpaa.

Siulittaasoqarfiup inatsisissatut siunnersuutaani siunnersuutigineqarpoq aalajangersagaq § 2, imm. 4, oqaaseqatigiinni kingullerni, ingerlateqqinneqassasoq. § 2, imm. 4-mi aalajangersagaq ima oqaasertaqarpoq:

"Inatsisartunut ilaasortaq pisuni immikkorluinnaq ittuni
atingaasarsiaqaataanngitsumik sulinngiffeqarnissamut akuerineqarpat, ilaasortaq
atingaasarsiaqartitaassanngilaq aningaasartuutinulluunniit tapiissutinik
pisartagaqassanani, taamatullu aamma sulinngiffeqarallarnerup nalaani
soraarnerussutisiassanut ilaasortaajunnaarnersiutinulluunniit
katersaqarsinnaanani. Aammattaaq sulinngiffeqarallarnissamut
akuersissuteqarnissamut sinniisussamik aggersaanermi aningaasartuutinik
Inatsisartunut ilaasortap akiliuteqarnissaa piumasaqaatigineqarsinnaavoq."

Taamaalilluni aalajangersagaq taamaallaat atorneqarsinnaavoq pissutissaqarluni najuussinnaannginneq sulinngiffeqarnerluunniit tamatumunnga sanilliunneqarsinnaasoq pineqartillugit, tassa pisuni immikkorluinnaq ittuni aningaasarsiaqaataanngitsumillu sulinngiffeqartoqartillugu. Taamaalilluni erseqqippoq suli pinaveersaartitsiniarluni immikkut aalajangersagaq pineqartoq, taamatullu aamma pisuni immikkorluinnaq ittuni aatsaat atorneqartartussaasoq, tassa isumaqarnarpat malittarisassat atornerlunniarneqartut imaluunniit sinniisussamik ataatsimiigiaqqusineq innuttaasunit isigagulu pissusissamisuunngitsutut tiguneqarsinnaassappat.

Aalajangersagaq maannamut suli atorneqarsimannngimmat soorunami Suleriaatsimut Ataatsimiitaliamut nalileruminaappoq aalajangersagaq ingerlatiinnarneqartariaqarnersoq.

Aalajangersagaq maannamut suli atorneqarsimannngimmat aalajangersakkallu siunertaa takorluukkersaarnertut pissuseqarmat Ataatsimiitaliaq isumaqarpoq aalajangersagaq ajornaquteqanngitsumik inatsisissatut siunnersuummit peerneqarsinnaasoq.

3. pill.: Suleriaatsimut Ataatsimiitaliaq isumaqarpa § 2, imm. 3-p danskisuuni oqaatsinik amigaateqarnera iluarsineqartariaqartoq allannguutissatut siunnersuuteqarnikkut?:

Inatsisiniut Ataatsimiitaliap maluginiarsimavaa siunnersuutip danskisuuan § 2, imm. 3-p oqaasertalerneqarnissaanut siunnersuummi oqaatsit "*i situationer*" (pisuni) siunnersuutip inaarutaasumik aaqqissorneqarnerani katassimannguatsiartut.

Tamanna inatsisiliornermi teknikkut kukkunerinnaavoq siunnersuutip imarisaanut sunniuteqartussaannngitsoq. Taamaattumik ataatsimiitaliap pissutissaqarsorinngilaa taassuma imaaliallaannaq iluarsineqarnissaa.



4. pill.: Suleriaatsimut Ataatsimiititaliaq isumaqarpa § 2, imm. 4, oqaaseqatigiit siulliit oqaasertalerneqarnerat erseqqissarneqarsinnaasoq?:

Aalajangersagaq siunnersuutigineqartoq ima oqaasertaqarpoq:

"Imm. 4. Inatsisartunut ilaasortaq pisuni immikkorluinnaq ittuni aningaasarsiaqaataaangitsumik sulinngiffeqarnissamut akuerineqarpat, ilaasortaq aningaasarsiaqartitaassanngilaq aningaasartuutinulluunniit tapiissutinik pisartagaqassanani, taamatullu aamma sulinngiffeqarallarnerup nalaani soraarnerussutisiassanut ilaasortaajunnaarnersiutinulluunniit katersaqarsinnaaanani..."

Inatsisinut Ataatsimiititaliap maluginiarsimavaa – aalajangersakkap aamma siusinnerusukkut oqaasertalerneqarsimaneratut - aalajangersakkami § 2, imm. 4-tut siunnersuutigineqartumi atuarneqarsinnaasoq Inatsisartunut ilaasortat piffissami aningaasarsiaqaratik sulinngiffeqarfigisaminni soraarnerussutisiassanut ilaasortaajunnaarnersiutissanullu katersaqarsinnaanngitsut. Inatsisinut Ataatsimiititaliaq isumaqarpoq pisariaqanngikkaluartoq oqaatigissallugu piffissani sulinngiffeqarfiusuni soraarnerussutisiassanut katersisoqarsinnaanngitsoq, tassami Inatsisartunut ilaasortanut soraarnerussutisiat 1. januar 2004-miit aningaasarsiat 10 procentiattut tunniunneqartalernikuummata, soraarnerussutisiaqalernissamut aningasaateqarfimmut nakkartinneqanngikkunik qaammammut aningaasarsianut ilanngullugit tunniunneqartartunik. Aningaasarsiaqartitsisoqanngippat soorunami aamma soraarnerussutisiassanut akiliuteqartoqassanngilaq.

Suleriaatsimut Ataatsimiititaliap oqaatigisariaqarpaa tamanna inatsisilerinermi teknikimut taamaallaat tunngammat siunnersuutip imarisauut pingaeruteqanngitsoq. Taamaattumik ataatsimiititaliap ajoriffissaqartinngilaa Inatsisinut Ataatsimiititaliap pissusissaatut pissusissamisoortutut isigippagu allannguutissatut siunnersuuteqarnikkut aalajangersakkap oqaasertalerneqarnerata allanngortinneqarnissaa.

5. pill.: Suleriaatsimut Ataatsimiititaliaq isumaqarpa § 2, imm. 5-imi aalajangersakkap oqaasertalerneqarnera erseqqissarneqarsinnaasoq?:

Aalajangersagassatut siunnersuutigineqartoq ima oqaasertaqarpoq:

"Imm. 5. Inatsisartunut ilaasortaq Naalakkersuisunut ilaasortatut atuuuffeqarniarluni sulinngiffeqarallarnissamut akuerineqartoq, sulinngiffeqarallarnerup nalaani ilaasortaajunnaarnersiutissanik katersaqarsinnaanngilaq."

Inatsisinut Ataatsimiititaliaq isumaqarpoq tulliuttumi erseqqinnerusumik sukumiinerusumillu allatut oqaasertaliinakkut inatsisitigut pissutsit atuuttut ingerlateqqinniarneqartut allaaserineqartut:

*"Imm. 5. Inatsisartunut ilaasortaq Naalakkersuisunut ilaasortatut atuuuffeqarniarluni sulinngiffeqarallarnissamut akuerineqartoq, sulinngiffeqarallarnerup nalaani **Inatsisartunit** aningaasarsiaqartitaassanngilaq sulinngiffeqarallarnerullu nalaani **Inatsisartunit** ilaasortaajunnaarnersiutissanik katersaqarsinnaanani."*



Takuneqarsinnaasutut aalajangersakkat taakku marluk assigiinngissutigineqarpaavaat Inatsisinut Ataatsimiititaliap allatut oqaasertaliinissamik siunnersuutaatigut erseqqissarneqarmat Inatsisartunut ilaasortat Naalakkersuisutut atuuuffitsik isumaginiarlugu Inatsisartunit sulinngiffeqartut Inatsisartunit aningaasarsiaqartinneqaratillu ilaasortaajunnaarsiuutissanik katersaqarsinnaanngitsut. Tamatuma soorunami allanngortinngilaa Naalakkersuisut *Naalakkersuisunit* aningaasarsiaqartinneqarlutillu naalakkersuisuujunnaarnersiuutissanik katersisussaammata.

Inatsisinut Ataatsimiititaliap oqaasertaliinissamut siunnersuutaatigu aalajangersagaq erseqqissarneqarpooq. Imarisamigut inatsisitigut pissutsinut ullumikkut atuuttunut naapertuulluinnarpooq. Suleriaatsimut Ataatsimiititaliap pitsaasutut isigissavaa, aalajangersagaq Inatsisinut Ataatsimiititaliamit siunnersuutigineqartutut erseqqissarneqarpat.

6. pill.: Qanigisamik toqusoqartillugu pinartumilluunniit napparsimasoqartillugu ilaasortat akiliunneqarlutik angalasinnaanerat pillugu aalajangersakkat inatsimmi § 2, imm. 4-mit allamut nuunneqarniarput. Ataatsimiititaliaq tamatumunnga oqaaseqaatissaqarpa?

Inatsisisattut siunnersummi siunnersuutigineqarpooq aalajangersagaq § 4-mi, imm. 5-itut nutaatut ilanngunneqassasoq.

Inatsisinut Ataatsimiititaliap isumaliutigaa pissusissamisuunnginnerunersoq aalajangersagaq § 3a nutaatut imaluunniit pisariaqarpat § 1, imm. 7-itut nutaatut ilanngunneqarpat. Tamanna pissusissamisoorluinnartutut isikkoqarpooq, tassami § 4-mi aalajangersagaq annerusumik ilaasortanut Nuup avataani najugaqartunut tunngammaat, tamannalu *pissutissaqalersitsisinaalluni* malittarisasat paatsoorneqarnerannik isumaqartoqalerluni ilaasortat Nuuk avataani najugallit kisimik qanigisamik toqusoqartillugu pinartumilluunniit napparsimasoqartillugu pissutissaqarlutik najuutinngikkallarsinnaasut akiliunneqarlutilluunniit angalasinnaatitaasut. Nalorngisitsisinaanerit tamakku pinngitsoorniartariaqarput.

Suleriaatsimut Ataatsimiititaliap Inatsisinut Ataatsimiititaliaq isumaqatigaa aalajangersagaq pissusissamisoornerpaassagaluarpat § 3a-tut nutaatut imaluunniit tamanna pisariaqarpat § 1-imi imm. 7-itut nutaatut ilanngunneqarpat.

7. pill.: Suleriaatsimut Ataatsimiititaliaq isumaqarpa § 6, imm. 10-11-mi aalajangersakkat oqaasertalerneqarneri erseqqissarneqarsinnaasut?

Inatsisinut Ataatsimiititaliaq isumaqarpooq aalajangersakkat taaneqartut inatsisisattut siunnersuutip danskisuuani oqaasertalerneqarnerat eqqarsaatigalugu erseqqinnerusinnaagaluartut.

Tamanna tunngavigalugu Inatsisinut Ataatsimiititaliaq aalajangersakkat allatut oqaasertalerneqarsinnaanerannik marlunnik siunnersuuteqarpooq, oqaasilerineq eqqarsaatigalugu eqqornerusorisaminik.

Suleriaatsimut Ataatsimiititaliap oqaatigisariaqarpaa tamanna inatsisilerinermi teknikimut taamaallaat tunngammaat siunnersuutip imarisaaanut pingaaruteqanngitsoq. Taamaattumik ataatsimiititaliap ajoriffissaqartinngilaa Inatsisinut Ataatsimiititaliap pissusissaatut pissusissamisoortutut isigippagu allannguutissatut siunnersuuteqarnikkut aalajangersakkap oqaasertalerneqarnerata allanngortinngarnissaa. Oqaasertalerneqarnera massakkutut allassimanermisut ajoqutaasussaannngimmat Ataatsimiititaliaq peqatigitillugu isumaqarpooq



aalajangersakkap allanngortinneqarnera immini tunngavissaasinnaanngitsoq allannguutissatut siunnersuuteqarnissamut.

8. pill.: Siunnersuutip danskisuuta qulequtaani kukkuneqarpoq.

Inatsisiniut Ataatsimiititaliap siumorsimavaa siunnersuutip danskisuuta qulequtaani taaguutitoqqat Landstinget aamma Landsstyret kukkusumik atorneqartut. Inatsisiniut Ataatsimiititaliaq isumaqarpoq tamanna allannguutissatut siunnersuuteqarnikkut iluarsineqartariaqartoq.

Suleriaatsimut Ataatsimiititaliap oqaatigisariaqarpaa tamanna inatsisilerinermi teknikimut taamaallaat tunngammat siunnersuutip imarisauut pingaaruteqanngitsoq. Ataatsimiititaliap isumaqatigaa tamanna allannguutissatut siunnersuuteqarnikkut iluarsineqartariaqartoq.

Ikinngutinnersumik inuulluaqqusillunga

Lars-Emil Johansen
Suleriaatsimut Ataatsimiititaliap Siulittaasua